

Terima kasih Yang Berhormat Yang Di-Pertua,

Assalamualaikum Warahmatullahi Wabarakatuh dan Salam  
Sejahtera

بِسْمِ اللَّهِ الرَّحْمَنِ الرَّحِيمِ

أَلْحَمْدُ لِلَّهِ رَبِّ الْعَالَمِينَ ، وَالصَّلَاةُ وَالسَّلَامُ عَلَى أَشْرَفِ الْمُرْسَلِينَ،  
وَعَلَى آئِلِهِ وَصَحْبِهِ أَجْمَعِينَ، وَمَنِ تَبَعَهُمْ بِإِحْسَانٍ  
إِلَى يَوْمِ الدِّينِ

## **Yang Berhormat Yang Di-Pertua dan Ahli-Ahli Yang Berhormat.**

1. Kita bersyukur ke hadrat Allah Subhanahu Wata'ala kerana dengan izin-Nya juga kita telah dapat bersidang selama 12 hari dalam Mesyuarat Pertama dari Musim Permesyuaratan Ke Empat Belas Majlis Mesyuarat Negara 2018. Alhamdulillah, kita telah dapat meluluskan beberapa akta penting khususnya Akta Perbekalan 2018/2019. Dengannya, insya-Allah, akan membolehkan Kerajaan untuk melaksanakan Rancangan Pembangunan Negara demi meningkatkan tahap kemajuan ekonomi dan sosial bagi menjamin kesejahteraan rakyat dan penduduk Negara ini.

Di kesempatan ini kaola sukacita menyertai Ahli-Ahli Yang Berhormat yang berucap pagi tadi bagi mengucapkan

setinggi-tinggi tahniah kepada Yang Berhormat Yang Di-Pertua di atas kebijaksanaan dan kewibawaan Yang Berhormat Yang Di-Pertua dalam memimpin dan memandu permesyuaratan Majlis Mesyuarat Negara ini dengan tenang dan sabar serta sungguh lancar dan teratur lagi efisen serta memberikan kesempatan dan laluan dengan penuh saksama kepada ahli-ahli yang dilantik untuk mengemukakan pengamatan dan pandangan serta soalan-soalan dan kepada ahli-ahli dari pihak Kerajaan pula untuk memberikan penjelasan dan jawapan. Dengannya permesyuaratan kita telah berjalan dengan lancar dan teratur dalam semangat permuzakarahan dengan telus, terbuka serta hormat menghormati selaras dengan konsep Melayu Islam Beraja.

**Yang Berhormat Yang Di-Pertua dan Ahli-Ahli Yang Berhormat,**

2. Sepertimana juga pada tahun kewangan sebelum ini, Mesyuarat kita masih berlangsung di dalam keadaan Negara masih lagi berhadapan dengan berbagai bentuk cabaran termasuk kedudukan ekonomi global yang tidak menentu dan kedudukan fiskal Kerajaan yang masih lagi menanggung defisit walaupun jumlahnya berkurangan.

3. Sekali lagi kita bersyukur Kehadrat Allah Subhanhu Wata'ala kerana di bawah kepimpinan bijaksana Kebawah Duli Yang Maha Mulia Paduka Seri Baginda Sultan dan Yang Di-Pertuan Negara Brunei Darussalam, Kerajaan Baginda masih mampu untuk menyediakan peruntukan kewangan yang munasabah bagi Peruntukan Kewangan 2018 / 2019 demi memelihara ketenteraman dan kesejahteraan rakyat dan penduduk Negara ini.
4. Alhamdulillah, sepanjang tempoh permesyuaratan ini kita telah membincangkan pelbagai isu, mendengar cadangan dan pandangan mengenai pembangunan infrastruktur, memajukan asset-asset kerajaan dengan meneroka kaedah pembiayaan alternatif seperti Public Private Partnership

Cadangan dan pandangan yang membina dan bernilai dari Ahli-Ahli Yang Berhormat itu sangat-sangat dihargai.

5. Cadangan, saranan serta pandangan-pandangan yang diketengahkan di dewan ini akan membantu pehak kerajaan dalam meneliti rancangan-rancangan yang sedang dan akan dilaksanakan. Kerajaan akan mengambil perhatian dan meneliti kesesuaianya untuk dilaksanakan menurut keutamaan dan bagi penambahbaikan semata-

mata bagi memangkin kebajikan dan kesejahteraan hidup rakyat dan penduduk negara ini menuju sasaran Wawasan 2035.

Ada diantara cadangan yang disarankan itu memerlukan bagi pihak Kerajaan untuk menilai dengan sehalus-halusnya terutama sekali yang melibatkan peruntukan yang sebahagiannya mungkin belum dapat dilaksanakan dalam keadaan ekonomi Negara pada masa ini.

6. Walaubagaimanapun, Kaola masih berharap dan tertunggu-tunggu untuk mendengar lebih banyak pandangan dan saranan Ahli-Ahli Yang Berhormat mengenai cara-cara kita mengawal defisit samada dengan meningkatkan hasil atau mengurangkan perbelanjaan. Kaola juga mengongsikan aliran matawang Brunei ke luar negara yang semakin meningkat dari setahun ke setahun. Pada tahun 2017 matawang Brunei yang diterima daripada pehak Monetary Authority of Singapore (MAS) berjumlah BND1.403 bilion berbanding dengan jumlah yang dikembalikan kepada MAS sebanyak SGD7.32.

Pada tahun 2017 Kerajaan telah berusaha menurunkan beberapa cukai barang. Kementerian Perusahaan Utama dan Pelancongan dan beberapa agensi Kerajaan dan swasta pula menggerakkan beberapa inisiatif menjurus bukan saja

untuk menarik pelancung luar negara tetapi bagi menggalakkan orang ramai di negara ini untuk berbelanja di dalam negeri. Semua inisiatif ini memerlukan sokongan semua pihak untuk memberikan impak yang berkesan.

### **Yang Berhormat Yang Di-Pertua dan Ahli-Ahli Yang Berhormat**

7. Kita juga turut berbangga dengan pencapaian Negara dalam *Ease of Doing Business* dimana secara keseluruhannya telah meningkat dimana pada tahun ini, kita berada di tangga ke 56 dari kalangan 190 Negara di seluruh dunia. Dengannya, kerajaan berharap untuk dapat menarik lebih banyak lagi pelabur-pelabur asing untuk melabur di Negara ini. Insha Allah Kerajaan akan terus menerus berusaha untuk menyediakan eko sistem yang kondusif bagi menjadikan Negara Brunei Darussalam destinasi menarik bagi FDI. Ianya juga tidak dapat dinafikan bahawa kehadiran syarikat-syarikat ini telah dapat membantu membangunkan Negara dan meningkatkan kadar pekerjaan bagi anak-anak tempatan.
8. Kita bersyukur dengan penglibatan para belia secara aktif dalam berbagai bidang kegiatan kemasyarakatan,

keugamaan, pendidikan, kesokanan, keusahawanan dan kesukarelawanan serta penglibatan mereka dalam kegiatan-kegiatan NGOs. Kita menyaksikan bahawa dengan diberikan ruang, platform dan laluan disertai dengan sokongan dan galakan, mereka berjaya memperkasa diri mereka bergerak dengan cergas melaksanakan rancangan-rancangan bermenfaat kepada mereka dan negara. Mereka bersedia melengkapkan diri dengan latihan-latihan kemahiran seperti yang diungkayahkan oleh Pusat Pembangunan Kapisiti dan menceburi pekerjaan seperti yang dibuktikan oleh 619 orang belia yang sekarang bertugas di Pulau Muara Besar.

9. Kita menghargai walaupun dalam jumlah yang kecil minat dan kesediaan mereka meneroka bidang pertanian dan perikanan. Kita masih menaruh harapan yang tinggi untuk sebahagian besar para belia mengambil punggur kehadapan bergiat lebih aktif dalam majlis-majlis Perundingan Kampong dan Mukim, memperkasa kegiatan ekonomi dan sosial di peringkat kampong dan mukim yang sekali gus bersama-sama menyumbang kepada memelihara keselamatan dan kesejahteraan dan mengatasi isi-isu jenayah dan sosial.
- 10.** Kita menaruh keyakinan dan harapan ada gulungan belia

dan orang tempatan untuk tampil mengambil alih perniagaan dalam berbagai bidang yang pada masa ini dijalankan oleh peniaga-peniaga luar negeri seperti kedai runcit, pembinaan, malah kedai gunting dan kedai jahit bukan sebagai juru jual tetapi pengurus dan pemilik.

**Yang Berhormat Yang Di-Pertua dan Ahli-Ahli Yang Berhormat,**

11. Kebawah Duli Yang Maha Mulia Paduka Seri Baginda Sultan dan Yang Di-Pertuan Negara Brunei Darussalam telah membangkitkan mengenai isu kebersihan dan ianya turut mendapat perhatian serious Ahli-Ahli Yang Berhormat di Dewan ini. Pada pandangan saya, isu ini akan dapat kita atasi dengan lebih berkesan jika setiap individu mempunyai tanggungjawab dan berperanan untuk sentiasa menjaga kebersihan alam sekitar. Isu kebersihan ini dapat diatasi jika semua orang menganggap memelihara kebersihan rumah dan persekitarannya suatu kemestian atau keperluan hidup. Malah dari segi ugama Islam, kita dituntut untuk sentiasa bersih dan mengamalkan kebersihan dalam semua aspek.

Jawatankuasa induk isu-isu kebersihan yang telah ditubuhkan pada Februari 2016 telah pun menjalankan

berbagai-bagai inisiatif kearah mempertingkatkan tahap kebersihan seluruh Negara iaitu untuk menjadikan Negara Brunei Darussalam Negara yang bersih, selamat, indah serta menarik.

**Yang Berhormat Yang Di-Pertua dan Ahli-Ahli Yang Berhormat,**

12. Sebagai jentera Kerajaan, kita hendaklah bersatu padu demi memastikan kesejahteraan rakyat dan penduduk negara ini. Sebarang penambahbaikan adalah memerlukan sokongan dan dokongan semua pihak dan ini termasuk Agensi-agensi Kerajaan dan bukan kerajaan yang menjurus kepada dasar '*Whole of Nation Approach*'. Oleh itu, rakyat dan penduduk negara ini juga hendaklah memainkan peranan aktif dan positif dalam membantu semua usaha pembangunan negara ini.
13. Rancangan-rancangan yang telah dikongsikan di Dewan yang mulia ini, menunjukkan bahawa kita memang mempunyai impian dan aspirasi untuk merealisasikan Brunei Maju dan Wawasan Brunei 2035. Akan tetapi, hendaklah ianya sentiasa realistik dan *achievable* dengan berpandukan kepada *Delivery Approach* dan melaksanakan *Key Performance Indicator (KPI)* bagi memastikan setiap

rancangan dan sasaran-sasaran untuk dilaksanakan dalam jangkamasa pendek, sederhana dan panjang dapat dilaksanakan dengan jayanya dengan mengambil kira keutamaan dan ‘cost effectiveness’

14. Marilah kita sama-sama melangkah kehadapan dan menjadikan Negara Brunei Darussalam sebuah Negara yang cemerlang lagi dihormati dengan ekonomi yang berkembang dan rakyat yang bekualiti tinggi. Dalam masa yang sama, kita juga perlu sentiasa bijak menangani sumber yang sedia ada disamping meraih peluang-peluang lain dihadapan kita baik di arena global serantau maupun didalam Negeri sendiri. Semua ini adalah sejajar dengan tema Anggaran Belanjawan 2018/2019 iaitu “Perbelanjaan Produktif dan Berinovasi bagi memelihara kemakmuran negara”.

### **Yang Berhormat Yang Di-Pertua dan Ahli-Ahli Yang Berhormat,**

15. Kaola disini ingin untuk merespon perkara yang dikemukakan oleh Yang Berhormat Awang Haji Mohimin bin Haji Johari mengenai Skim Perkhidmatan Penghulu dan Ketua Kampong. Perkara ini telah juga diutarakan semasa membincangkan Anggaran Belanjawan Kementerian Hal Ehwal Dalam Negeri. Perkara yang berkaitan dengan status

Penghulu dan Ketua Kampong yang mengikut skim ini akan dipersarakan telah dan sedang diteliti oleh Lembaga Perjawatan Penghulu dan Ketua Kampong. Lembaga berkenaan juga sedang meneliti cadangan atau pilihan terbaik bagi mengatasi masaalah ini.

16. Sebelum kaola mengakhiri ucapan penangguhan ini, kaola sukacita mengucapkan setinggi-tinggi penghargaan dan terima kasih kepada Yang Dimuliakan Jurutulis Majlis Mesyuarat Negara, Timbalan Jurutulis dan seluruh kakitangan Majlis Mesyuarat Negara yang telah sama-sama menjayakan Persidangan Masjlis Mesyuarat Negara pada tahun ini dengan lancar dan teratur.

Sekian. Wabillahi Taufiq Walhidayah Wassalamualaikum Warahmatullahi Wabarakatuh.